

الكيلو بـ 75 وليمون الشورية هدية ☐☐ جزار بالبحيرة يحطم الأسعار



الاثنين 1 يناير 2018 08:01 م

"دلح كرشك" إسم غريب اختاره المعلم أشرف عويس، لجزارته بمدينة الدلنجات بمحافظة البحيرة، ولكن الأغرب منه بالتأكيد هي الأسعار التي وضعها لبيع اللحوم بها، فبعد أيام قليلة من مفاجأته بإعلانه بيع اللحم البقري البلدي بسعر 80 جنيهًا للكيلو، عاد ليفاجيء زبائنه ثانية بالنزول بسعر الكيلو إلى 75 جنيهًا، وهو سعر كفيل بإثارة دهشة واستغراب كل من يسمعه ☐

وبسؤال المعلم عويس عن السر في انخفاض أسعار اللحوم لديه قال: "سعر كيلو اللحم قائم وصل قبل العيد إلى 65 جنيه، دلوقتي سعره بقى 48 جنيه، يعني 17 جنيه أقل في الكيلو القائم، الأمر الثاني إنني ببيع اللحم طازج وده بيخدم الجزار عن لو باعها بعد ما تدخل الثلجة وتنشف ودهنتها تطلع".

"وأضاف: "البقري مكسبه حلو والعجل الواحد الجزار بيكسب فيه أكثر من 5 آلاف جنيه، هيجرى إيه لو قللوا مكسبهم شوية علشان يربحوا الناس ويخففوا عنهم، أقل جزار بقى عنده بدل العربية الواحدة عربيتين وثلاثة ومزرعة وكله من دم الغلابة".

"فضلت طول عمري شغال في اللحمة الجملي معرفتش أجيب غير عربية كارو، دلوقتي بقالي كام شهر بس بشتغل في اللحمة البقري كملت ثمن عربية " قالها بنبرة يؤكد من خلالها أن البيع بهذا السعر يحقق له مكاسب مرضية للغاية ☐

ويتحدث عويس، عن تبعات قراره بتخفيض أسعار اللحوم وخشيته من انتقام المنافسين قائلا: " الموضوع ده عملي مشاكل كثير مع الجزارين، وكلهم بيقولولي ما ينفعش كده وإلي انت بتعمله ده وقفلنا حالنا، وجاتلي تهديدات من بعضهم بس أنا مايهمنيش غير إن الغلبان ياكل لحمة".

ويكشف عويس، عن مفاجأة أخرى بخلاف السعر تتمثل في تقديمه لهدايا لزبائنه: " إحنا مش بس بنبيع بأقل سعر في مصر، لاوبنقدم هدايا كمان للزباين، مع أي كمية حتى لو ربع كيلو ليمون الشورية علينا، والي بيشتري كيلو وربع ليه عليه كيلو مخروطة ".

بثقة تحدث عويس مدافعا عن جودة اللحوم التي يقدمها قائلا: "فيه ناس الأول كانت بتشكك في جودة اللحمة بتاعتنا علشان عمرهم ماسمعوا السعر ده، لكن لما جربوا غيروا رأيهم، والحمد لله ناس كثير عرفت مكاني وبقوت بتجيلي من أماكن كتير خارج البحيرة من اسكندرية والغربية، وياخدوا كميات كبيرة ليهم ولقرايبهم، وبفضل الله كل يوم بادح مش أقل من 3 عجول بيتباعوا في ساعتها مفيش حاجة بتبات منهم ".